

P R A V I L N I K
o prodaji šumskih drvnih sortimenata
u JP“Šume TK“DD Kladanj

Kladanj, oktobar 2010.godine

Na osnovu Odluke Vlade Federacije Bosne i Hercegovine o načinu prodaje šumskih drvnih sortimenata porijeklom iz državnih šuma na teritoriji F BiH (Službene novine F BiH broj:52/09 od 10.08.2009.godine i 25/10 od 28.04.2010.godine) i na osnovu ovlaštenja iz člana 130. tačka 26. Statuta Preduzeća, Nadzorni odbor na sjednici održanoj dana: 19.11. 2010.godine, donosi

P R A V I L N I K **o prodaji šumskih drvnih sortimanata**

I. OPŠTE ODREDBE

Član 1.

Ovom Pravilnikom uređuje se način prodaje šumskih drvnih sortimenata sa područja na kojima gazduje Javno preduzeće „Šume Tuzlanskog Kantona“ dioničko društvo Kladanj (u daljem tekstu: Preduzeće) .

Član 2.

Pod prodajom šumskih drvnih sortimenta podrazumijeva se prodaja šumskih proizvoda pravnim i fizičkim licima na način i pod uslovima iz ovog Pravilnika.

Šumski proizvod je svaki šumski proizvod koji potiče iz šume, a ne obuhvata sekundarne šumske proizvode.

Član 3.

Prodaja šumskih drvnih sortimanata vrši se na jedan od sljedećih načina:

1. prodaja putem ugovora za sukcesivnu isporuku,
2. prodaja licitacijom / javnim nadmetanjem,
3. prodaja za potrebe mjesnog stanovništva.

Na osnovu godišnjeg plana proizvodnje šumskih drvnih sortimanata Preduzeće planira količine prodaje po načinima prodaje. Plan prodaje po načinima prodaje razmatra i usvaja Uprava Preduzeća najkasnije do kraja jedanaestog mjeseca tekuće godine za narednu poslovnu godinu.

Preduzeće dostavlja detaljne, polugodišnje i godišnje izvještaje o prodaji šumskih drvnih sortimenata resornom federalnom i kantonalnom ministarstvu.

Član 4.

Pravo učešća u kupovini šumskih drvnih sortimenata imaju sva pravna lica koja ispunjavaju sljedeće opšte uslove:

1. Za prodaju putem ugovora za sukcesivnu isporuku da posjeduju:
 - rješenje o upisu u sudski registar,
 - dokaz o ispunjavanju uslova za obavljanje djelatnosti rezanja drveta, cijepanja drveta, polufinalne, finalne i hemijske prerade drveta,
 - transakcijski račun kod banke,
 - porezni i PDV broj.
2. Za prodaju licitacijom i prodaju visokovrijednih sortimenta da ispunjavaju uslove navedene pod tačkom 1. i/ili dokaz o ispunjavanju uslova za promet šumskih drvnih sortimenata i PDV broj.
3. Za sve načine prodaje:
 - da nisu u sporu sa Preduzećem u vezi isporuke/nabavke drveta,
 - da su solventni,
 - da mogu avansno platiti šumske drvne sortimente ili obezbijediti bankarsku garanciju,
 - da nisu dužnici Preduzeću ili da su ranija neisplaćena dugovanja regulisali ugovorom o izmirenju duga, odnosno da su uplatili sve dospjele rate po ugovoru.

II. PRODAJA PUTEM UGOVORA ZA SUKCESIVNU ISPORUKU

Član 5.

Ugovori za sukcesivnu isporuku šumskih drvnih sortimenata zaključuju se na kraju poslovne godine za narednu i obavezno sadrže količinu, vrstu, kvalitet šumskih drvnih sortimenata, rokove isporuke, rokove i način plaćanja.

Ugovori za sukcesivnu isporuku šumskih drvnih sortimenata zaključuju se na obrascu ugovora koji je propisala Uprava Preduzeća.

Član 6.

Ovisno o procjeni situacije na tržištu, tj. trenutnog odnosa ponude i tražnje, Preduzeće može objaviti i javni poziv za prikupljanje ponuda za zaključivanje ugovora za sukcesivnu isporuku šumskih drvnih sortimenata.

Preduzeće prikuplja zahtjeve kupaca za zaključivanje ugovora za sukcesivnu isporuku do kraja godine za narednu godinu. Kupci ispostavljaju zahtjeve za dodjelu ugovora za sukcesivnu isporuku šumskih drvnih sortimenata na obrazcu koji utvrđuje Uprava Preduzeća zajedno sa utvrđivanjem kriterija za dodjelu ugovora za sukcesivnu isporuku.

Član 7.

Kriterije za dodjelu ugovora za sukcesivnu isporuku šumskih drvnih sortimenata utvrđuje jednom godišnje Uprava Preduzeća, a na osnovu rezultata istraživanja tržišta i spoznaje o odnosu ponude i tražnje. Kriteriji moraju biti u skladu sa ciljevima Preduzeća, objektivni i mjerljivi, te osigurati maksimalnu efektivnost za Preduzeće.

Član 8.

Za praćenje realizacije odredbi iz ugovora odgovorni su direktor, direktori šumskih gazdinstava, zaposlenici koji obavljaju odnosne poslove, direktor za ekonomsko-finansijske poslove, referent prodaje.

III. PRODAJA LICITACIJOM / JAVNIM NADMETANJEM

Član 9.

Licitacija / javno nadmetanje podrazumijeva prodaju određene količine šumskih drvnih sortimenata putem javnog oglašavanja, a po kriteriju ponuđene najviše cijene. Licitacija/javno nadmetanje objavljuje se na internetu, WEB stranici i na oglasnim pločama preduzeća. U cilju postizanja boljih efekata prodaje, preduzeće može objaviti oglas o prodaji i u dnevnim novinama koje se objavljuju na teritoriji Bosne i Hercegovine.

Licitacija / javno nadmetanje se može vršiti na sljedeće načine:

- predprodajom;
- naknadnom prodajom.

Član 10.

Predprodaja je prodaja svog drveta iz jednog odijela prije izvođenja radova. Kupac preuzima sve sortimente po sortimentnom napadu na šumskom stovarištu. Prodavac vlastitim sredstvima ili angažovanjem registrovanih izvođača, posječe, izradi i izvuče drvene sortimente. Krojenje, klasiranje i primanje drvnih sortimenata kod panja, te otpremu vrši prodavac. Prodavac vrši nadzor nad poslovima sječe, izrade i izvlačenja šumskih drvnih sortimenata.

Naknadna prodaja je prodaja šumskih drvnih sortimenata po klasama i mjerama na šumskom ili centralnom stovarištu javnim nadmetanjem/licitacijom.

Član 11.

Postupak prodaje šumskih drvnih sortimenata odvija se u skladu sa procedurama opisanim u Uputstvu Direktora Preduzeća o prodaji šumskih drvnih sortimenata javnim nadmetanjem / licitacijom.

Član 12.

Naknadnom prodajom u toku poslovne godine Preduzeće je obavezno ponuditi minimalno 20% klasiranih šumskih drvnih sortimenata tehničke oblovine na šumskom ili centralnom stovarištu.

Izveštaji o realizaciji prodaje naknadnom prodajom sačinjavaju se i razmatraju najmanje jednom mjesečno na sjednicama Uprave Preduzeća.

Član 13.

Ukupna količina deklasiranog drveta prodaje se naknadnom prodajom.

IV. PRODAJA ŠUMSKIH DRVNIH SORTIMENTA MJESNOM STANOVNIŠTVU

Član 14.

Prodaja šumskih drvnih sortimenata mjesnom stanovništvu podrazumijeva prodaju šumskih drvnih sortimenata mjesnom (lokalnom) stanovništvu za zadovoljenje njihovih vlastitih potreba, na način i uz poštivanje procedura opisanih u ovom Pravilniku i Uputstvu o procedurama kolanja dokumentacije i rokovima dostave iz računovodstveno-finansijske i tehničke oblasti.

Preduzeće će nastojati udovoljiti potrebama mjesnog stanovništva i u skladu sa planiranim količinama.

Član 15.

Mjesnom stanovništvu mogu se prodavati:

- ogrevno drvo na panju (uzgojne sječe u visokim degradiranim i izdanačkim šumama i mjere njegu u šumskim kulturama);
- ogrevno drvo na međustovarištu;
- sabir iza redovnih sječa nakon izvršene primopredaje odjela,
- sitno tehničko drvo (hmeljovke, kolje, stožine, bunarske motke, pulčevi i sl.) na panju i međustovarištu.

Član 16.

Prodaja tehničke oblovine lokalnom seoskom stanovništvu može se odobriti samo za izgradnju kuća ili pomoćnih objekata na lični zahtjev, u količini potrebnoj za gradnju planiranog objekta, a najviše do 15 m³, na sljedeći način i na sljedećim lokacijama:

- a) u šumi na panju iz sanitarnih sječa, (uzgojne sječe u visokim degradiranim i izdanačkim šumama i mjere njege u šumskim kulturama), odobrava se sječa kupcu uz predhodno odbairanje i obilježavanje stabala za sječju i nadzorod strane ovlaštenog zaposlenika Preduzeća. Nakon izvršene sječe i izvlačenja iz šume do međustovarišta vrši se premjeravanje drveta od strane ovlaštenog zaposlenika Predeuzeća i uplata od strane kupca. Po izvršenoj uplati i predočavanju uplatnice od strane kupca drvo se stavlja u promet uz odgovarajući otpremni dokument;
- b) na međustovarištu se tehnička oblovinu prodaje i stavlja u promet nakon izvršene uplate i predočavanja uplatnice uz odgovarajući otpremni dokument.

Obrazac zahtjeva za kupovinu tehničke oblovine je sastavni dio ovog Pravilnika.

Najveća količina ogrevnog drveta koju može kupiti jedno domaćinstvo (porodica) u toku kalendarske godine je 10 (deset) m³. Prodaja drvnih sortimenata mjesnom stanovništvu vrši se u skladu sa Planom odjela predviđenih za maloprodaju.

V. UTVRĐIVANJE CIJENA ŠUMSKIH DRVNIH SORTIMENTATA

Član 17.

Prodajne cijene šumskih drvnih sortimenata utvrđene su u Cjenovniku šumskih drvnih sortimenata, koji usvaja Nadzorni odbor Preduzeća, a najmanje jednom godišnje vrši se korekcija cijena iz Cjenovnika. Nove cijene utvrđuju se metodom rezervne cijene.

Član 18.

U uslovima poremećaja na tržištu drvnih sortimenata, Preduzeće može donijeti Odluku o smanjenju cijena drvnih sortimenata od cijena iz cjenovnika u sljedećim slučajevima :

- Ukoliko se prilikom objave prodaje drvnih sortimenata putem licitacije/javnog nadmetanja ne uspije prodati količina koja je planirana za prodaju u skladu sa članom 12. ovog Pravilnika,
- U slučaju da se Ugovorima za sukcesivnu isporuku ne može prodati količina koja je predviđena ovakvim načinom prodaje i ukoliko nema interesa kupaca za preuzimanjem drvnih sortimenata,
- Ukoliko su cijene u okruženju tj. cijene u drugim ŠPD-ovima manje od cijena u preduzeću,
- U svim slučajevima kada se određene robe lageruju na stovarištima i kada nema potražnje od strane kupaca za iste, a da ne bi došlo do propadanja i deklasiranja drvnih sortimenata.

Član 19

Procedura smanjenja cijena propisuje se ovima pravilnikom, a provodi se na sljedeći način :

- Na pismeni prijedlog Komisije za prodaju drvnih sortimenata putem licitacije, ukoliko se putem tri objavljena oglasa ne može prodati količina koja je predmet licitiranja,
- Prijedlog se dostavlja na razmatranje Upravi preduzeća, a Odluku o smanjenju cijena donosi Nadzorni odbor na prijedlog Uprave preduzeća,
- Na pismeni prijedlog direktora Šumskih gazdinstava koji se razmatra na Upravi preduzeća te daje prijedlog za smanjenje cijena Nadzornom odboru koji donosi Odluku o smanjenju cijena,
- Na pismeni prijedlog Ekonomsko - finansijskog odijela koji se dostavlja na razmatranje Upravi preduzeća a odluku o smanjenju cijena donosi Nadzorni odbor na prijedlog Uprave preduzeća.

Član 20

Po utvrđivanju novih cijena za šumske drvene sortimente Preduzeće obavezno na svojoj internet stranici i oglasnim pločama vrši objavljivanje istih.

Član 21.

Ukoliko se utvrdi da Preduzeće ima zalihe šumskih drvnih sortimenta čija je stvarna vrijednost ispod tržišne i čijom prodajom se ne mogu ostvariti cijene iz Cjenovnika, direktor šumskog gazdinstva imenuje komisiju od 3 (tri) člana.

Komisija iz predhodnog stava vrši popis zaliha šumskih drvnih sortimenata i daje prijedlog cijena, koje razmatra i odobrava Uprava Preduzeća, a iste su početna cijena za javno nadmetanje / licitaciju.

VI. PRELAZNE I ZAVRŠNE ODREDBE

Član 22.

Na pitanja koja nisu uređena ovim Pravilnikom, a odnose se na prodaju šumskih drvnih sortimenata primjenjivat će se odluke Nadzornog odbora, Uprave Preduzeća i uputstva direktora.

Član 23.

Direktor Preduzeća, u skladu sa ovlaštenjima, izdavat će, po potrebi, uputstva i rješenja za primjenu ovog Pravilnika.

Član 24.

Ovaj Pravilnik stupa na snagu danom donošenja i bit će objavljen na internet stranici i oglasnim pločama Preduzeća.

Član 25.

Sa početkom primjene ovog Pravilnika prestaju važiti odredbe Pravilnika o prodaji šumskih drvnih sortimenata broj: 9996/09 od 26.11.2009.godine i isti se stavlja van snage.

JP "Šume TK "DD Kladanj
- Nadzorni odbor -

Predsjednik Nadzornog odbora
Selimbašić Senad, dipl.ing.šum.

Broj: 11168-01 / 10
Datum: 19.11.2010.godine

(ime, očevo ime i prezime)

(jedinstveni matični broj)

(adresa stanovanja)

(kontakt telefon)

Javno preduzeće „Šume Tuzlanskog Kantona“ dioničko društvo Kladanj
Ul. Fadila Kurtagića 1, 75280 Kladanj
ŠUMSKO GAZDINSTVO: _____

PREDMET: ZAHTJEV ZA KUPOVINU TEHNIČKOG DRVETA

Obraćam se naslovu da mi u smislu odredaba Zakona o šumama F BiH i Opštih uslova prodaje šumskih drvnih sortimenata iz državnih šuma na teritoriji F BiH odobri kupovinu tehničke oblovine, i to sljedeće drvene sortimente:

1. _____ u količini od _____ m³ (neto)
2. _____ u količini od _____ m³ (neto)
3. _____ u količini od _____ m³ (neto)

Tehničku oblovinu ću koristiti isključivo za vlastite potrebe, tj. za izgradnju:

- c) vlastite kuće
- d) pomoćnog objekta

na lokalitetu _____.

Za izgradnju objekta potrebno je _____ m³ tehničke oblovine.

Tehničko drvo želim kupiti na:

- a) na panju
- b) na međustovarištu

(mjesto i datum)

(potpis podnosioca zahtjeva)

Javno preduzeće „Šume Tuzlanskog Kantona“ dioničko društvo Kladanj

MIŠLJENJE PO ZAHTJEVU

Zahtjev se:

- a) odobrava
- b) ne odobrava

Realizacija šumskih drvnih sortimenata izvršit će se u skladu sa odredbama važećih zakona koji regulišu prodaju SDS i Pravilnika o prodaji šumskih drvnih sortimenata u JP „Šume Tuzlanskog kantona“ DD Kladanj količini od _____ m³ (neto), gospodarska jedinica: _____, Odjel _____.

(upravnik šumarije)

M.P.

(direktor gazdinstva)